

Visoki predstavnik se sastao sa hrvatskim predstavnicima u organima vlasti

Visoki predstavnik, Wolfgang Petritsch, je jučer održao sastanak sa predsjednikom Federacije BiH, Karlom Filipovićem, dužnosnicima Hrvatima u Vladi Federacije BiH: Nikolom Grabovcem, Mijom Anićem, Zvonkom Mijanom, Dubravkom Lovrenovićem i Mladenom Ivankovićem, predsjedavajućim Doma naroda Federacije BiH, Ivom Komšićem i vršiocem dužnosti predsjedavajućeg Zastupničkog doma Federacije BiH, Ivanom Brigićem, na kojemu se razgovaralo o aktuelnim pitanjima u Federaciji BiH, kao i o ostvarivanju pune ravnopravnosti Hrvata kao konstitutivnog naroda u Bosni i Hercegovini.

Visoki predstavnik i hrvatski dužnosnici su se suglasili da će organi vlasti u Federaciji BiH i dalje djelovati kako bi se osigurala stvarna puna ravnopravnost naroda, aktivna uloga u odlučivanju Hrvata kao konstitutivnog naroda, te implementacijom Odluke Ustavnog suda BiH o konstitutivnosti naroda, uspostavili mehanizmi zaštite njihovih vitalnih nacionalnih interesa.

Učesnici sastanka su se složili da je važno pronaći odgovarajuće rješenje na kontraverzno pitanje mostarskog "Aluminijuma", koje bi bilo utemeljeno na pozitivnim zakonskim propisima. Tokom sastanka je pomenuta i činjenica da se ne posvećuje dovoljna pažnja uspjesima federalnih organa vlasti, kao što je sanacija stanja u Vojsci Federacije BiH, sistemska pomoć Vlade Federacije BiH proračunu Posavskog kantona, osiguranje interventnih sredstava za sanaciju posljedica poplava u Posavini, uplata invalidnina ratnim vojnim invalidima HVO, organiziranje obnove mosta u Zapljini i dr.

Visoki predstavnik i hrvatski političari naglasili su važnost nastavka ovakvog dijaloga i svoju spremnost da i dalje nastave razmjenjivati informacije o pitanjima koja se odnose na ustavne promjene i status Hrvata u Bosni i Hercegovini. U skladu s tim, dužnosnici Hrvati u federalnim organima vlasti i OHR će ubuduće održavati redovne sastanke kojima će kopredsjedavati predsjednik Federacije, Karlo Filipović i viši zamjenik visokog predstavnika, Matthias Sonn.